

本

山

綱

目

本草綱目拾遺藤部目錄

雞血藤膠

七金藤

鹿角藤

買麻藤

紅木香

紅皮藤

雷公藤

藤黃

金鎖銀開

乳藤

蝙蝠藤

皆治藤

無根草

麥裏藤

白毛藤

天毯草

松蘿

松上寄生

楓上寄生

蛇莆藤

李頭藤

龍鬚藤

臭藤根

黃練芽

木龍藤

萁油

本草綱目拾遺卷七

錢唐趙學敏恕軒氏輯

合肥張紹棠又堂氏刊

藤部

雞血藤膠

產猛緬去雲南昆明計程一月有餘乃藤汁也土人取其汁如割漆然濾之殷紅似雞血作膠最良近日雲南省亦產其藤長亘蔓地上或山崖一莖長數十里土人得之以刀斫斷則汁出如血每得

一莖可得汁數升彼處有店市之價亦不貴乾者

極似山羊血取藥少許投入滾湯中有一線如雞

血走散者真○雲南志順甯府出雞血藤熬膏可

治血症○滇遊雜記雲南順甯府阿度里地方有

一山縣亘數十里產藤甚異粗類椴梁細似蘆葦

中空如竹剖斷流汁色赤若血故土人名之為雞

血藤每歲端陽日攜帶釜甑入山斫取熬煉成膏

泡酒飲之大補氣血與老人婦女更為得益或不

飲酒者早晚用開水化服亦能奏效○
按順甯刊
售藥單云

順甯府順甯縣阿度吾山產此又云阿度吾里萬
名山寺龍潭箒所產載于郡志有二種其一種起
鼓丁刺者尤佳或盤屈于地或附樹而生伐之中
通細竅汁凝如脂煮之有香者真或云兩種糯者
爲雌放者爲雄應昌附注

壯筋骨已酸痛和酒服於老人最宜○治老人氣
血虛弱手足麻木癱瘓等症○男子虛損不能生
育及遺精白濁○男婦胃寒痛○婦女經水不調
赤白帶下○婦女乾血勞及子宮虛冷不受胎○
陸象咸云曾見婦人合藥服之多年不育者後皆
有子○滇志雞血藤膠治風痛溼痹性活血舒筋

本草綱目拾遺 卷一 三
患在上部飽食後服在下部空心酒服不飲酒者
滾水調服其色帶微綠有清香氣酒服亦能興陽
尤明府 佩蓮 云此膠治跌打如神其太夫人一日
偶閃跌傷臂痛不可忍用山羊血參三七治之多
不驗有客教服此膠沖酒一服其疾如失其性捷
走血分可知

順甯土人加藥料煎熬雞血膏其煎膏之時忌有
孕婦看見決熬不成亦神物也統治百病能生血
和血補血破血又能通七孔走五臟宣筋絡治婦

人經水不調四物湯加減八珍湯加元胡索爲引
婦女勞傷氣血筋骨酸痛轉筋牛膝杜仲沈香桂
枝佛手乾木瓜穿山甲五加皮砂仁茴香爲引大
腸下血椿根皮煎湯送下男子虛弱八味加減爲
引服此膠忌食酸冷

吾杭龔太守官溟帶有雞血藤回里予覲見之其
藤皮細潔作淡黃色切開中心起六角稜如菊花
樣色紅四圍仍白色乾之其紅處輒突出二三分
許竟成紅菊花一朶亦奇物也聞其藤最活血暖

腰膝已風癱戊申長見景炎在四川敘州府與滇
之昭通接界因囑其往覓此藤所寄來者外形不
殊而中心惟作小紅點乾之亦不突起據來書云
實金沙江土司山中所得然與龔太守所帶來者
絕不相類豈此藤亦有二種耶附記於此以俟考
○辛亥予在臨安患臂痛胡春熙明府長君名什
曾宦滇南歸里蒙贈雞血藤膠皆方塊每塊一二
兩不等外塗以蜃灰作白色剖視其內皆黑色如
膏藥膠狀云風癱痺痛有效其外灰見水卽脫去

據言其藤產騰越州銅壁關外新街所屬地遍山谷皆是新街守弁每歲輒命卡兵斫取熬膏除餽遺各上司及僚友外餘剩者轉市客商販入中土藉沾微利以爲守資渠所有卽售自彼處也外必以蜃灰飾之庶久藏不壞因帶歸以示兒子景炎則又全非其所見景炎會館昭通大關司馬白公家見其所藏雞血藤膠猩紅成塊儼如赤玉光潤可愛今胡公所贈內作黑色或係年久色黯抑係新街所產與大關有別惜不能親歷其地爲之細

核附筆於此以俟後之君子考訂焉

七金藤

性溫無毒治中風痰迷半身不遂左癱右瘓不省
人事痰涎上壅攻心作咽用一錢白湯磨下○小
兒急慢驚風大者五分小者一二分白湯磨下立
效如神

鹿角藤

一名白毛刺汪連仕方云木本藤也刺長傷人皮
肉立腫疼不休又名不薪木山人不斫

性大熱氣臭打痞積治風氣如神皆用根搗共香糟罨之

葉 蒸酒服能鑽筋透骨

子 食之大能醉人

買麻藤

職方典出肇慶緣樹而生有子味苦可食山行斷取其汁飲之可以止渴○**粵志**買麻藤其莖多水渴者斷而飲之滿腹已餘水尙淋漓半日性柔易治以製履堅韌如麻故名言買藤得麻也

本草綱目拾遺 卷一 紅木香
治蛇咬 鮮者乾者俱效

紅木香 紅皮藤

一名廣福藤又名紫金皮立夏後生苗枝莖蔓延
葉類桂略尖而軟葉蒂紅色咀之微香有滑涎根
入土入藥用須以水洗淨去外粗皮取內皮色紅
者用之入口氣味辛香而涼沁如龍腦

治風氣痛傷力跌撲損傷胃氣疼痛食積痧脹等
症俱酒煎服紫金錠中必不可少

雷頭風腫痛貼痛法紫金皮獨活赤芍白芷蒿蒲

葱頭煎濃如膏調敷藥到立止如神

汪連仕云金谷香今人呼緊骨香卽紅木香一名木臘正名紫金皮土產者功淺入膏用行血散氣

紅皮藤

朱烺齋任城日鈔錢塘門外道姑橋下有紅皮藤凡患半肢風及大麻風者取藤四兩浸無灰酒一大壺入鍋內隔湯煮三炷香取起飲酒量好者以醉爲度每酒一盃入藥酒三四匙陸續飲至藥酒完則風氣自愈其風從指甲縫中出對指尖以竹

本草綱目推選 卷一 一
紙鋪凡上驗之紙能吹動卽是指尖風出也

雷公藤

生陰山腳下立夏時發苗獨莖蔓生莖穿葉心莖上又發葉葉下圓上尖如犁耙又類三角風枝梗有刺○物理小識犁頭刺藤其葉三角如犁頭多在籬邊生可治瘰癧亦可截瘡 一名霹靂木方勝板倒金鉤烙鐵草倒挂紫金鉤河白草犁尖草括耙草龍仙草魚尾花三木棉出江西者力大土人採之毒魚凡蚌螺之屬亦死其性最烈以其草

烟熏蠶子則不生養蠶家忌之山人採熏壁蝨
治臃脹水腫痞積黃白疸瘧疾久不愈魚口便毒
癰疽跌打除壁蝨莖燒牀下一切毒蛇傷萬病回
春云凡被蛇傷用板扛歸不拘多少此草四五月
生至九月見霜卽罕有葉尖青如犁頭尖樣藤有
小刺子圓如珠生青熟黑味酸用葉搗汁酒調隨
量服之渣罨傷處立愈

白火丹

救生苦海用雷公藤五錢平地木三錢

車前四錢天青地白葉三白草各三錢煎服○又

本草綱目拾遺 卷一
洗方雷公藤河白草煎浴

水腫脹 救生苦海平地木三錢雷公藤五錢車
前草四錢天青地白草三錢路路通五個打碎煎
服重者十服愈

坐板瘡 秋泉家祕烏賊骨五錢雷公藤三錢共
爲細末擦之乾則以菜油調敷

汪連仕方蒸龍草卽震龍根山人呼爲雷公藤蒸
酒服治風氣合巴山虎爲龍虎丹入水藥魚人多
服卽昏

治翻胃噎膈瘧疾吐血便血喉痹食積心疼虛飽
腹脹陰囊腫大跌打閃肭發背疔瘡乳癰產後遍
身浮腫 王安采藥方

藤黃

綱目主治條下祇言點蛀牙自落無他治也張石
頑云藤黃性毒而能攻毒故治牙蟲蛀齒點之卽
落毒能損骨傷腎可知葉氏得窠本草云服藤黃
藥忌喫烟按三黃寶蠟丸黎峒丸俱用藤黃以其
善解毒也有中藤黃毒者食海蜇卽解○百草鏡

藤黃出外洋及粵中乃藤脂也以形似筆管者良
大塊者名牛屎藤黃不佳入藥取色嫩純明者用
水蒸化濾去渣盛瓷器內隔水煮之水少時再添
煮乾以三炷香爲度以帛紮瓷器口埋土中七日
取出如此七次曬乾用○粵志廣中產黃藤熬汁
卽藤黃也性最寒以青魚膽和之治眼疾閒有白
者葉如土茯苓身小而長外有籜包以莖浸水洗
目並除腫痛

性酸澇有毒治癰疽止血化毒斂金瘡亦能殺蟲

治刀斧木石傷及湯火傷竹木刺入肉一切諸傷
神效膏 用真麻油一觔藤黃八兩白蠟八兩先
將油入銅鍋次將藤黃搥碎熬透以麻布濾去渣
加入白蠟至滴水成珠爲度貯瓷罐其膏夏老冬
嫩爲宜敷之卽能止疼止血收口取效如神○金

不換 治跌打刀傷

蘇州周慎庵傳藤黃一兩

研細末麻油四兩白蠟五錢黃蠟一兩將二蠟入
麻油內銅杓熬化取起放地上一人徐徐下藤黃
末一人不住手攪勻以盡爲度卽成膏敷於患處

用油紙攤貼綢帕縛好一二日卽愈

治一切無名腫毒風氣膏

王站柱不藥良方藤

黃四兩白蠟八兩小磨麻油十二兩先將油煎熟
將成珠入水不散再加黃白攪勻瓷瓶收面上仍
以麻油養之臨用攤貼○祝氏效方一筆消 用
大黃二兩藤黃一兩明礬蟾酥各五錢麝香乳香
沒藥各二錢用蝸牛搗爛作錠遇小瘡毒未出癩
頭以此醋磨新筆蘸藥圈外愈圈愈小圈毒消盡
而止○又一筆消方治一切癰腫 雄黃膽礬

砂藤黃銅綠皮消草烏各一兩麝香二錢爲細末
和蟾酥爲條如筆管大金箔爲衣用時以醋磨濃
新筆蘸藥塗毒四圍數次卽愈○消毒散 治癰
疽瘡毒及初生多骨疽 良方彙選大黃一兩芙
蓉葉曬乾爲末五倍子各一兩麝香冰片各三分
藤黃三錢生礬三錢共爲末米醋調成如厚糊塗
於多骨疽之四週中留一頭如豆大以醋用鷺翎
不時埽之若不埽任圍則無益一日夜卽內消其
餘癰瘡亦以此敷之神效 又方雄黃二兩麝香

三錢藤黃一兩人中白五錢硃砂白芨生白蘞各
二錢蟾酥一兩共研末用廣膠三錢烱化和藥末
爲錠遇毒將此藥磨醋水塗之○消毒方 治一

切無名腫毒及對口發背 救生苦海用滴花燒

酒磨藤黃敷不住手敷之不至半日卽消○無回

丹治一切疔癰腦疽 眾妙方用鹼藤黃雄黃大

黃各一兩蟾酥麝香各二錢血竭甲片炒各五錢

醋磨塗立效○移毒方 救生苦海云如毒生在

肢節穴道險要處不成漏症卽爲廢人須用此藥

只塗半圈卽移過一邊用白芨白朮三七五倍子
大阜角山茨菰藤黃各等分俱剉薄片除藤黃餘
皆入砂鍋內水浸一日煎汁傾出入水再煎如此
數次濾淨熬膏以藤黃將水蒸烱加入攪勻再熬
入盃曬乾用時以雞蛋清磨出濃汁新筆蘸塗
又方藤黃銀硃等分醋和敷趕毒至他處出膿如
用穀樹汁調可搽癬一二次卽消○大提藥方
圍毒初起凡對口發背惡疽四五日卽消 良方
彙選雄黃藤黃麝香各一錢硃砂三分薤麻肉三

錢紅昇丹一錢五分先將薺麻研如泥後和各藥
研爛用象牙匣封藏外以虎皮包之方不泄氣

種福堂提藥方治諸毒不起敷之立起藤黃雄黃
各三錢蟾酥紅藥各二錢冰片麝香各一錢薺麻
肉一兩先將薺麻肉去皮打如魚凍水入諸藥打
成膏瓷罐收貯勿令洩氣或云宜紅藥三錢冰片
蟾酥勿用止加麝香三分辰砂一錢又黃提藥方
鬱金雄黃藤黃各二錢牛黃蟾酥硃砂冰麝各五
分巴豆肉八錢薺麻肉一兩共搗爛瓷瓶貯遇症

放膏藥上少許貼之治一切惡毒未成可消已成
用之化腐疔毒更妙 諸毒圍藥 祝氏效方南
星炒四兩五倍子炒黑白芫炒各二兩藤黃薑黃
炒各一兩共爲細末醋調塗重者加牛黃一錢鹿
茸五錢 又種福堂方無膿卽消有膿卽潰五倍
子一兩白芷六錢藤黃百草霜各三錢生半夏生
南星白芫陳小粉飛麪各四錢共爲末紅醋調敷
○箍毒 活人書五倍子略焙一兩藤黃四兩銅
青少許小粉炒八兩作錠用時醋磨塗○一切無

名腫毒 藤黃五錢五倍子二兩白蜜葱頭各一
兩用米醋調圍患處留頂勿敷○五色蟾酥墨
能立消腫毒雄黃銀硃膽礬韶粉藤黃銅綠礪砂
各一兩麝香一錢共爲末蟾酥爲條如筆管大水
磨塗

疔瘡 吳興楊氏便易良方銀硃蛭蟥白甘菊人
中白苧根內白心雄黃藤黃大黃共搗敷上卽退
坐板瘡 仙遺拾珠藤黃搗碎用雄豬網油青布
一長條將藤黃摻在網油之上青布捲成條子線

紮緊浸菜油內一夜火燃取滴下油杯積埋土中
一夜出火毒塗瘡卽效

五黃散 治一切頑癬 雞腳大黃硫黃雄黃薑

黃藤黃各等分爲細末菜油調塗患處七日勿洗
浴全愈

金氏離洞膏 治賺瘡如神 萬應油五兩藤黃

一兩五錢淨黃蠟二兩共熬黑櫻色攤貼熬萬應
油法香油六十兩以十六兩官秤作準淨桃枝一
兩柳枝一兩槐枝一兩桑枝一兩葱一兩男髮四

兩花椒五錢薤麻二兩馬前四兩葦芡五錢桂枝
一兩白芷二兩夏浸三日冬七日春秋五日然後
熬至渣枯去渣每筋生油熬熟汁得八折此油凡
一切膏藥可作地子

金鎖銀開

百草鏡云俗名鐵邊箕處處山野有之葉似天薺
冬葉又似土茯苓葉但差狹小耳藤生或緣石砌
樹上竹林內亦有之非海金沙也其根黑色兩旁
有細刺如邊箕樣故名入藥用根 敏按今俗所

用治一切喉症金鎖銀開乃天蕎麥之根形如纍
丸黏結成塊產山上者皮黃汙泥中者皮黑與百
草鏡所言各別或名同而物異耶○李氏草祕天
蕎麥亦名金鎖銀開形若蕎麥治乳癰風毒入諸
散毒藥內取根二分生薑一分水煎服愈治敗血
久病不痊又洗痔血皆佳○李氏草祕又云小青
草藤上蔓有倒摘刺細如稻芒開粉紅花生藍子
葉似蕎麥又名野蕎麥煎洗痔漏之聖藥
治白濁用根搗汁沖酒服

喉中風火○孫玉庭云其根專治喉閉故得此名
喉風喉毒用醋磨漱喉涎痰去而喉閉自開矣

痰核癭癧 不拘何等癭痺結核初起者梁湖陳

府祕方用金鎖銀開須鮮者將來搗汁沖酒服其
莖葉用白水煮爛和米粉作餅餌食之不過二三
服立消若破爛者以梁上烏龍尾揉去粗屑納瘡
中外貼膏藥亦服根汁喫餅餌五六次自結痂而
愈

洗痔漏治蛇傷木虵毒搗汁和酒服

草祕

汪連仕采藥書金鬚斜俗呼金鎖銀開其苗柔而
堅性不斷今名象毛力能軟堅化痞合米醋搗汁
鹽口能開鎖纏喉風雖枯根亦可透鎖喉

乳藤

粵志乳藤蔓如懸鉤倒挂葉尖而長斷之有白汁
如乳婦人產後以藤搗汁和米作粥食之乳湮自
通○初生嫩條可食其大實曰冬榮子大如柚子
中有瓢瓣瓣相疊白如豬脂炙食皆甘美身懷數
日香不減秋末冬初閒采以相餉矜爲服食之珍

行血通乳

粵志

○李氏草祕乳汁藤生山麓林中

高二三尺葉似蒲萄子藍色一叢根皮掐之出汁

如乳爲諸乳毒癰瘡中之聖藥

排膿散毒生肌止痛消腫益血痛不可忍者罨之

卽止已成未成已潰未潰始終皆不可少

李氏草祕

汪連仕草藥方乳門草卽乳汁草又名土孀孀性

寒涼行乳汁通氣而能入血分根止痢疾 細藤

者卽遍地金又名雞盲草合雞肝蒸服專治小兒

一切疳眼

蝙蝠藤

此藤附生岳壁喬木及人牆茨側葉類蒲萄而小
多歧勁厚青滑絕似蝙蝠形故名

治腰痛癩瘰

腰疼 澹寮試效方用蝙蝠藤二兩老人用三兩
酒煎服二劑卽痛止不可再服若多服一劑腰反
傾倒不支

皆治藤

蔓延牆壁間長丈餘葉似泥藤中暑者以根葉作

粉食之虛損者雜豬胃煮服

無根草

采藥錄此草無根無葉生在柴草上纏結而生名
無根金絲草色有紫有黃○百草鏡無根金絲草
一名大焰草卽兔絲苗也生毛豆莖上者佳此草
與女蘿相似以色黃如金而細如線者真若色紅
紫粗類燈心者名女蘿又紫背浮萍亦名無根草
與此別○藥鑑無根金絲草莖細而赤無葉無根
惟有青色細纍附於莖際蔓延極長多纏草木上

其性涼味微甘利水治溼熱三四月採○李氏草
祕纏豆藤一名豆馬黃無葉有花子卽兔絲子最
治血解豆瘡毒難產酒煎服

藥性考金絲草無根葉用苗此藥功在涼血散血
故治癰疽腫毒諸症味苦性寒吐衄崩便欬咯諸
血服之能止解諸藥毒瘡癘疔癰惡瘡○臺志利
水通淋○葛祖方治狐臭騷氣辟汗愈瘧○百草
鏡治癰淋濁痢帶下黃疽預解痘毒敷紅絲疔
消毒保嬰丹

王之才醫便凡小兒未出痘瘡者

每過春分秋分日服一丸其痘毒卽漸消化若只服一二次者出痘稀少若服三年六次者永不出痘此方屢驗萬勿輕視 纏豆藤一兩五錢其藤八月收取毛豆莢上纏繞細紅絲採取陰乾以此爲君妙在此藥上黑豆三十粒赤豆七十粒山楂肉一兩新升麻七錢五分生地黃荆芥防風川獨活甘草當歸各五錢連翹七錢五分黃連赤芍藥桔梗各五錢牛蒡子一兩硃砂另研甘草同煮過去甘草一兩五錢苦絲瓜二個各長五寸隔年經

霜者妙燒灰存性右藥爲極細末砂糖拌勻共擣千餘下丸如李核大每服一丸濃煎甘草湯化下其前項藥預辦精料遇春分秋分或正月十五日或七月十五日修合務在虔誠忌婦人雞犬貓孝服見之合藥須淨室焚香向太陽祝藥云神仙眞藥體合自然嬰兒吞服天地齊年吾奉太上老君急急如律令勅一氣七遍

慈惠小編治小便不通諸藥無效○金絲草一握同韭菜根頭煎湯洗小肚卽通金絲草多附黃豆

莽上無根無葉細絲如椶色近水灘諸樹上皆有之

麥裏藤

各麥地皆有臨安縣鄉間尤多四月採之莖纏麥上葉類神仙對坐草而略尖微有毛葉對節生莖細節微紫葉小者佳葉大者無力

跌撲 張氏傳方以乾者一錢酒煎服

白毛藤

亦名天燈籠又名和尚頭草白毛藤生人家牆壁

上莖葉皆有白毛八九月開花藕合色結子生青
熟紅鳥雀喜食之○百草鏡白毛藤多生人家園
圃中牆壁上春生冬槁結子小如豆而軟紅如珊
瑚霜後葉枯惟赤子纍纍綴懸牆壁上俗呼毛藤
果採其藤乾之浸酒云可除骨節風溼痛

止血淋瘧疝氣汁滴耳中止膿不乾入藥內保腫
毒不大治癰痺用煮牛肉精者食之○清溼熱治
黃疸水腫小兒蛔結腹痛○採藥志云性熱活血
追風生血治鬼箭有效

風痛 楊氏驗方桑黃二兩白毛藤二兩切碎用
紹興原釀酒六斤煎三炷香每日服一飯盃

黃疸初起 白草鏡白毛藤神仙對坐草大茵陳

三白草車前草各等分白酒煎服

大氣脬 不藥良方用白毛藤無灰酒服

天球草

一名盒子草俗呼盒兒藤好生水岸道旁苗高三
四尺葉如波斯花有小絨五月結實爲球球內生
黑子二片生時青老則黑每片渾如龜背又名龜

兒草丹術家取其汁伏硫汞根伏雌雄○百草鏡
鴛鴦木鼈一名水荔枝盒兒藤葉長尖有鋸齒生
水涯蔓生秋時結實狀如荔枝色青有刺殼上中
有斷紋兩截相合藏子二粒色黑如木鼈而小孫
氏丹方盒子草子及葉有小毒蔓生岸旁葉尖花
白子中有二片如盒子

綱目附於榼藤後花實

根形俱不甚詳

性有小毒主蠱毒及蛇咬擣敷瘡上卽愈

疳積初起

百草鏡云鴛鴦木鼈三錢煎服愈

敏按此草似預知子近時人罕用而吳氏遵程著
從新以預知子爲近日所無直不知卽天球草也
世不用而草醫又易以他名

松蘿

〔山川志〕出武當山生高峯古木上長者丈餘

治蛇虎傷湯火烙傷及頑瘡等症

〔藥性考〕松蘿

甘平能平肝氣暝怒痰熱溫瘧吐痢頭風頭瘡癭
瘤結聚亦能探吐膈痰去熱

松上寄生

利水導痰除胸中熱

楓上寄生

〔注〕連仕云吊殺猢猻一名上樹猢猻又名鐵角猢猻兒乃楓樹上風木藤至年遠結成連珠傀儡能追風不換時刻酒蒸服加金雀根土當歸石牀花根石蠶治癱瘓勾急之要藥

蛇蒲藤

〔職方典〕產福甯莖細葉如猴耳

治喉齒百病

李頭藤

職方典產福甯其藤腐朽者可代香用

止嘔血活經絡

龍鬚藤

粵東小錄藤產東莞微細如髮直起數丈無一節
常飛越數樹如千百游絲牽綴紅者名紅龍鬚紫
者名紫龍鬚有五色然生無根蒂以穢物投之卽
消釋不知所去土人以其液和細土石灰塗釁糖
釜其堅如鐵雖猛火不裂其花與子皆入藥

浸酒服補筋骨祛風解毒能循脈絡無微不至

藥性考五色龍鬚藤細如髮生無根蒂挂樹長發臭藤根

草寶云此草二月發苗蔓延地上不在樹間係草藤也葉對生與臭梧桐葉相似六七月開花粉紅色絕類牽牛花但口不甚放開搓其葉嗅之有臭氣未知正名何物人因其臭故名爲臭藤其根入藥本年者細小二三年者大如萊菔可用○李氏草祕云臭藤一名卻節對葉延蔓極臭煎洗腿足

本草綱目拾遺 卷一
三三
諸風寒溼痛拘攣不能轉舒如神○汪氏藥錄臭
蒲萄蔓延而生子如蒲萄而臭治風又云野蒲萄
氣重味臭功能敗腸胃之癰

治瘰癧 用根煎酒數服自愈未破者消已潰者
斂

治風痛腸癰跌打損傷流注風火痺毒散鬱氣洗
疝合紫蘇煎湯 汪連仕方

黃練芽

今呼黃連芽一名黃槿頭春初采嫩芽小兒生食

之取其清香可口味帶苦澹如黃連故名亦可以
鹽湯焯食漉出曝乾爲鹽菜暑月食之○百草鏡
此物藤生引蔓大樹上葉如桑寄生尖長柔滑頗
光潤肥厚二三月枯枝生芽淡紅色如椿芽生食
苦中帶甘入口生津安飡人家多醃以爲菜與芹
芽椿芽蘆芽並重○藥性考云葉似槐而尖嫩時
揉乾代茶勝茗木甚細膩苦中帶甘味如橄欖鹽
食酸甜解喉痛咽哽消熱醒酒舌爛口糜嚼汁可
解

味苦澁性寒解暑止渴利便 食物宜忌 生津明目

清積熱解毒 藥檢

敏按方以智物理小識黃棟頭一名回味俗呼黃連頭樹分葉如椿大者合抱春采其葉味苦而甘皮可合香入藥治痢及霍亂綱目遺此未收如方氏所云則木也與百草鏡所云互異或地土有不
同耶抑其物本有二種耶並存俟考

木龍藤

周益生家寶方藤出錢塘橫山喜沿人家牆壁及

看望上土人多識之

治肺癰肚癰腸癰脇癰四症搗汁老酒沖服冬月以酒搗取汁二盃服立效

萇油

按萇卽扶留藤

萇卽蒟也嶺南人取其葉合檳榔食今人名櫓葉用其葉封固曬半載收貯待用可留數十年非獨疏積滯消瘴癘治病亦夥惟西洋人有之

治手足紅腫或疼以萇葉油揉擦用布包裹滴耳治耳痛刀傷刺傷以棉花浸萇油貼裏傷處又治

背癰及癩毒貼之初起者卽解散已成卽速潰膿亦可敷貼楊梅毒瘡漏痔以上俱泰西應振鐸本草補

本草綱目拾遺花部目錄

梅花 梅梗

雪荷花 雪芝
雪裏花

水仙花 子

催生蘭

珠蘭

建蘭花 葉根
草蘭

玫瑰花

金雀花

金蓮花

佛桑花

寶珠山茶

粉團花 根附

玉簪花

玉蘭花

丁香花

紫茉莉 根

野薔薇

秋海棠

茶菊 城頭菊
箭菊

金鈴菊
菊米
菊根 金

睡蓮

瑞香花

子午蓮

桃金娘

本草綱目拾遺
假素馨

千金花

梧桐花

金鳳毛

十姊妹

雨韭

罌粟子油

佛前舊供花

花部

梅花 梅梗

綱目載梅花無治方止言點湯煮粥助雅致而已
食物宜忌云梅花味酸瀋性平並無主治殆亦不
知梅花之用人藥最廣而功效亦最大○百草鏡
梅花冬蕊春開其花不畏霜雪花後發葉得先天
氣最足故能解先天胎毒有紅白綠萼千葉單葉
之分惟單葉綠萼入藥尤良採能不犯人手更佳
含苞者力勝性寒或曰平味酸瀋清香開胃散鬱

煮粥食助清陽之氣上升蒸露點茶止渴生津解暑滌煩○談撰卉木皆感春氣而生獨梅開以冬蓋東方動以風風生木故曲直作酸則酸者木之性惟梅之味最酸乃得氣之正北方水爲之母以生之則易感故梅先眾木而華癸辛雜識梅花無仰開者蓋亦自能巧避風雪耳驗之信然 粵志惟嶺南梅花最早冬至雷動地中則梅開地上蓋其時火之氣不足於地而發其最初之精華故梅開水之氣上足於天而施其最初之滋潤故雪落

雪洩也從肅殺之中洩其一陽之精以爲來春之
生生者也雪深則水氣足梅早明火氣足火氣足
而爲天地陽生之始陰殺之終使萬物皆復其元
梅之德所以爲大天地一陽之復不可見見之於
梅又其得氣之先也韶州梅長至已花臘月復開
尤盛有於舊蒂而作新花者其地屬嶺北故梅以
臘以正月開氣盛則開而又開瓊州梅有六出者
予謂梅五出者也五陽數也冬至一陽始復梅吐
花得陽之先者今六出乃得陰數矣蓋以地氣而

變苦於嚴寒故不用五而用六同於雪花也以梅
爲體以雪花爲用人見其六而不見其五藏五在
於六之中猶河圖之五在十中也河圖之一生水
梅得水氣之先故花於冬至與雪同時雪者水氣
所凝梅者水形所結卦皆屬坎水在天而凝雪水
在地而發梅水之數六寒極則雪花與梅皆六出
應其數也

花微酸瀆無毒清頭目利肺氣去痰壅滯上熱

本草

原始安神定魂解先天痘毒凡中一切毒

治療癰雞蛋開一孔入綠萼梅花將開者七朶封
口飯上蒸熟去梅花食蛋每日一枚七日全愈
脣上生瘡 赤水玄珠白梅瓣貼之神效如開裂
出血者卽止

紫金錠 宜端午日製合飛硃砂紅芽大戟處州
山茨菇千金霜川文蛤淨粉草河車以上六味各
二兩珍珠琥珀明雄黃冰片陳金墨各五錢梅花
蕊西牛黃各一兩川麝香四錢右各藥爲末乳篩
極細以糯米粉糊杵爲丸研用

稀痘神方 白梅花蕊三錢採飽綻者須預備曬
乾生地黃三錢當歸三錢生甘草一錢臍帶小兒
自己落下時去灰或礬用新瓦炙存性研末極細
同煎濃汁濾清熬膏作一日喫完小兒永不出痘
萬病回春載尹蓬頭混元丹治小兒諸虛百損用
梅花合混元衣注梅花解痘先天之毒

九仙奪命丹 集聽云又名十聖丹治七十二般
無名腫毒惡瘡流注火瘃等症硃砂三錢雄黃乳
香沒藥冰片血竭各二錢石膽礬銅青麝香枯礬

熊膽飛過黃丹各一錢五分蜈蚣蚯蚓殭蠶各二條微炒黃色去嘴梅花一升寒水石牛黃蟾酥白官粉硼砂各一錢全蠍九個蝸牛七條以上廿三味爲末研極細以硃砂一錢五分爲衣其修合之法先將蟾酥用乳汁化開共爲丸如丸不起略加麩糊如桐子大每服一丸令病人口嚼生葱一根嚼下又嚼一根極爛吐在手心上裹藥用滾熱老酒吞下量冷暖時候蓋被出汗如病人不能嚼人代嚼之亦可如無汗再服一丸自愈凡諸毒醫遲

毒走攻心必不可救若汗來遲以熱酒催之不可
以手摸摩患處如癢以舊木梳梳之自止

稀痘 集聽用綠萼梅花七朶須預養於花瓶內

春分日摘花半開者只用淨瓣搗爛白糖三匙滾
水服之毒卽全消免出痘矣小兒滿月後卽可服

梅花點舌丹 集驗治一切疔毒及惡瘡初起天

行瘟毒咽喉腫痛等症輕者二粒重者四粒先用
無根水送下次取一粒噙於舌下化之乳香去油
二兩珍珠豆腐煮過麝香水飛熊膽各六分沒藥

去油京牛黃苦苧麝硃砂礪砂蟾酥人乳泡血竭
雄黃水飛各二錢片腦一錢另研沈香一錢白梅
花陰乾一錢二分共爲細末用人乳汁化蟾酥丸
黍米大金箔爲衣

預稀痘疹 不藥良方每年臘月清晨摘帶露綠
萼梅蕊一百加上白糖搗成小餅令食之

三花丹 赤水玄珠將出痘之時用此能稀痘梅
花桃花梨花取已開未開盛開者陰乾爲末等分
兔腦爲丸雄黃爲衣用赤小豆菜豆黑大豆湯送

下

梅桃丹 赤水玄珠治痘已出未出不起不發隱
在皮膚並治麻症斑症用梅花一兩桃仁辰砂甘
草各二錢絲瓜五錢爲末每服五分參蘇湯下

痘不問前後凡黑陷咬牙寒戰用梅花六錢穿山
甲一兩仙靈脾五分麝香一錢爲末每服三五分
咬牙寒戰加人牙二三釐內托散送下

青梅散 錫山衣德堂稀痘良方用生青果核七
個打碎去仁曬乾研極細末不宜火焙又不宜沾

生水再用玉蝶梅花二十一朵去蒂共白蜜兩茶匙搗濃恰交春分時與小兒服永不出痘卽出亦不過三粒此方傳自江甯王培德家已九世無痘殤之兒真異方也

二氣丸 新安汪偉公先生傳其家親友凡小兒服此丸永不出痘其方卽前稀痘神方臍帶白坎氣梅花先天之氣故名二氣丸

七仙丹 張琰種痘新書治痘氣血兩虛灰白水泡癢塌等症黃芪二兩人參一兩甘草五錢紫河

車一兩梅花一兩五錢鹿茸一兩天靈蓋一個共

爲末每服八九分用內托散煎湯送下氣實者加

山查陳皮各五錢

應昌按天靈蓋卽或有益亦不可用況二方功效全不在此乎

二花散

種痘新書云能起五陷黃蠟梅花素心

者尤良陰乾不拘多少去毛殼罐盛聽用桃花陰

乾山查去核炒爲末小絲瓜陰乾爲末陳皮去白

人參黃芪炙甘草炙硃砂紫河車酒洗去筋蒸焙

乾鹿茸酒酥炙穿山甲取首尾四足者炒仙靈脾

去四弦刺酒焙人牙火燉韭汁焯七次天靈蓋洗

淨去酥各爲末用。按綱目梅花條下並無主治而於蠟梅花下亦僅言解暑生津而已不知蠟梅亦並非梅種其主治亦廣不僅治痘也

龍腦骨 種痘新書云治痘出未透心狂見鬼陷伏等症用梅花不拘多少曬乾爲末加冰片少許共研爲末以豬心血和勻爲丸狂譫者燈心湯引紫陷者以紫草煎湯調之加酒數茶匙化下

絕痘 楊春涯驗方用南方綠萼梅蕊未放採藏風乾逢四時八節節前一日用雞蛋一個打孔入

蕊紙糊好飯上蒸熟喫數次永不出痘卽出亦不過數粒

解痘毒 劉氏得效方立春前後三日採紅梅蕊半含半開者一鍾去蒂仍安鍾內磁碟蓋住一週時足氣汁升上用新搗盆未經五辛者擣研如泥捏成餅樣加明硃砂水飛一錢勻摻於上緩緩研勻再加白蜜少許丸如彈子曬半乾金箔爲衣遇四絕日每服一丸甘草湯下忌鐵器葷腥服過一丸後當日晚閒微微發熱次日遍身發出細癩是

其驗也。○種福堂方梅花丸治痘疹有起死回生之功。又換痘丹中梅蕊犀角麻黃膏並用。

朱禹功仙傳稀痘方赤豆黑豆菜豆各一兩研末入新竹筒中削皮留節鑿孔入藥杉木塞緊用蠟

封固臘月浸廁中一月取出風乾每藥配梅花片三錢每服一錢以經霜絲瓜藤筋煎湯下神效。

千里梅花丸途中備用 醫學指南用枇杷葉乾葛末百藥煎烏梅肉臘梅花甘草各等分爲末用蠟化開投蜜每蠟一兩加白蜜二錢和藥末搗二

本草綱目 卷一
三百下丸如雞頭實大夏月長途含化一丸津液
頓生寒香滿腹妙不可言

梅梗

諸梅樹皆可用以綠萼者佳凡梅有氣條青翠色
此條無葉止光梗出枝罅薛徵君生白曾言用以
通上下膈氣有效此氣條而非梗也用梗以帶葉
成枝者入藥綱目梅部載梅實及核仁根葉獨不
及梗

保產神效方

道聽集云凡婦人三月久慣小產

百藥不效者以梅梗三五條煎濃湯飲之復飲龍
眼湯無有不保者

雪荷花

雪芝
雪裏花

產伊犁西北及金川等處大寒之地積雪春夏不
散雪中有草類荷花獨莖亭亭雪閒可愛戊戌春
予於史太守處親見之較荷花略細其瓣薄而狹
長可三四寸絕似筆頭云浸酒則色微紅彼處土
人服之爲助陽要藥 憶舊遊詩話雪蓮花千年
不化元雪深處有之形似蓮花高可丈許取以釀

酒倍增春色蓋陰極而陽生之意耳亦產巴里坤等處西北域記雪蓮產積雪中一莖並蒂浸酒色碧性熱人稱其功同仙茅枸杞而不知其禍乃同砒鴆也蝦蟆比蓮尤甚予甥屠澗南自哈密回帶有雪荷花因訪其功效據言其地有天山冬夏積雪雪中有蓮以產天山峯頂者爲第一然不可得山腰次之其生也有雌雄土人採乾之成對以市性大熱能補陰益陽老人陽絕者浸酒服能令八十者皆有子

性大熱治一切寒症 此物產於極冷之地乃陰
極陽生故也 朱排山柑園小識雪蓮生西藏藏
中積雪不消暮春初夏生於雪中狀如雞冠花葉
逼肖花高尺許雌雄相並而生雌者花圓雄者花
尖色深紅性大熱能除冷疾助陽道豪家爭致之
以治房中之藥 灤陽銷夏錄塞外有雪蓮生崇
山積雪中狀如今之洋菊名以蓮耳其生必雙雄
者差大雌者小然不並生亦不同根相去必一兩
丈見其一再覓其一無不得者蓋如菟絲茯苓一

氣所化氣相屬也凡望見此花默往採之則獲如指以相告則縮入雪中杳無痕迹卽斲雪求之亦不獲草木有知理不可解土人曰山神惜之其或然歟此生寒極之地而性熱二氣有偏勝無偏絕積陰外凝而純陽內結坎卦以一陽陷二陰之中剝復二卦以一陽居五陰之上下是其象也然浸酒爲補劑多血熱妄行或用合媚藥其禍尤烈蓋天地陰陽均調萬物乃生人身之陰陽均調百脈乃和故素問曰亢則害承乃制自丹溪立陽常有

餘陰常不足之說醫家失其本旨往往以苦寒伐
生氣張介賓輩矯枉過直遂偏於補陽而參耆桂
附流弊亦至於殺人是未知易道扶陽而乾之上
九亦戒以亢陽有悔也嗜慾日盛羸弱者多溫補
之劑易見小效堅信者遂眾故余謂偏伐陽者韓
非刑名之學偏補陽者商鞅富強之術初用皆有
功積重不返其損傷根本則一也雪蓮之功不補
患亦此理矣

治痘不起發及悶瘡悶痘止用一瓣入煎藥中立

本草綱目拾遺
卷一
效屢試皆驗

陳海曙云

雪芝

南中紀聞衡岳閒有之乃冰霰所結歲久蒸積而成產陰崖絕壁閒晶瑩如玉懸挂峻坂非攀蘿捫級不可撷取

療肺疾降火清心

雪裏花

朱楚良在鎮海土人有采雪裏花者冬月嚴寒此花始生在招寶山龍潭旁環渚而發苗甚短小如

六月雪狀高不過二寸許每雪時開白花如豆大
土人采得乾之入藥

敷痔漏 以雪裏花爲末溼者乾摻乾者麻油調
搽一二度其痔卽消縮

水仙花

子

能去風澤肌膚潤毛髮治五心煩熱嘈雜不甯同
荷葉芍藥爲末服

催生蘭

粵志一名報喜蘭風蘭之族並非風蘭也花如蠟

梅而色紅紫香味亦同每莖作七八枝懸樹閒勿
侵地氣遇有吉事則開寤生者以花懸戶上卽生
○關涵嶺南隨筆報喜遇吉事始開種法以空爲
根以露爲命與風蘭同

主催生

珠蘭

藥性考珍珠蘭味辛窻茶香郁其根有毒可磨敷
癰癤 今名雞爪蘭花經云眞珠蘭一名魚子蘭
枝葉似茉莉花發長條細蕊與建蘭同時香亦相

似而濃郁過之好清者取其蕊焙茶尤妙但性毒
止可取其香氣故不入藥張篁壬云中條山有老
道士教人治狐魅有一女子爲雄狐所祟教以用
珠蘭根搗爛置牀頭俟狐來交時塗其莖物上狐
大嗥竄去次日野外得一死狐道士云此根狐肉
沾之卽死性能毒狐尤捷效也

建蘭花

葉根
草蘭

建蘭有長葉短葉闊葉諸種其花備五色色黑者
名墨蘭不易得乾之可治瞽目能生瞳神治青盲

最效紅花者名紅蘭氣臭濁不入藥黃花者名蜜
蘭可以止瀉青色者惟堪點茶或蜜浸取其甘芳
通氣分素心者名素心蘭入藥最佳蓋建蘭一莖
數花實蕙而非蘭也綱目以薰草爲蕙卽今零陵
香於蘭草下正誤條申言蘭草可佩乃孩兒菊古
名都梁香是也且斥寇氏丹溪二家所解蘭草混
入世俗之蘭花爲非而以蘭花爲幽蘭與蘭草迥
異然何以不立幽蘭一條不能無缺略之憾因急
補之

素心建蘭花乾之可催生除宿氣解鬱蜜漬青蘭

花點茶飲調和氣血寬中醒酒

閩小記建甯人家以蜜漬蘭花冬月

點茶芳香如初摘

葉 丹溪云建蘭葉稟金水之氣而似有火不知

其能散久積陳鬱之氣甚有力今時醫用以通舒

經絡宣洩風邪亦佳○本草匯云蘭葉稟金水清

芬之氣似有火獨走氣道入西方以清辛金不獨

開胃清肺消痰善能散積久陳鬱之結氣今人但

賞花香不知用葉亦缺典耳況藥味載內經甚少

蘭獨擅名所謂治之以蘭除陳氣也故東垣方中
每常用之與藿香枇杷葉石斛竹茹橘紅開胃氣
之神品入沈香鬱金白蔻蘇子蘆根汁下氣開鬱
治噎膈之將成者產閩中者力勝江浙諸種力薄
辛平甘寒陰中之陽入手太陰足陽明經亦入足
太陰厥陰經生津止渴開胃解鬱潤肌肉調月經
養營氣本經主利水道因其走氣道故能利水消
渴除胸中痰癖殺蠱毒不祥之氣者蓋肺主氣肺
氣鬱結則上竅閉而下竅不通胃主納水穀胃氣

凝滯則水穀不以時化而為痰癖蠱毒不祥之氣
辛平能散結滯芬芳能除穢惡則上症自除
本草
按綱目蘭草條不指幽蘭而本草匯草部有蘭草
所言皆指建蘭即瀕湖所云幽蘭是也今從其說
補之

根 名土續斷治跌打和血

物理小識幽蘭建蘭根甘宜入藥其花可

茹葉以浸油黑髮又云都梁蘭根名土續斷當是此也。五雜俎蘭根食之能殺人忌內服

治痰嗽後吐血。劉羽儀經驗方云先痰嗽後吐血而氣急者用天冬麥冬生地白芍紫苑山梔桑

皮地骨皮等藥如氣急去天冬加真蘇子取蘭花
根搗汁沖服尤妙。江夏程雲鵬著慈幼筏痘門
載清地散花飲凡痘見標三日此方主之有夾疹
者加蘭花根額上灰滯色加菊花蘭花梅花或蘭
花根亦可又玉液春膏飲中治背漿不足加酒炒
土蘭花

草蘭

葉短而狹小春花者名春蘭秋花者名秋蘭皆一
幹一花有一幹數花者名九節蘭其萼中無紅斑

點色純者名草素尤香入藥以一幹一花者良
根 治瘋狗咬行篋檢秘取根四兩水淨入黃酒
二盃煎成一盃服完其毒卽從大小便化血而出
玫瑰花

有紫白二種紫者入血分白者入氣分莖有刺葉
如月季而多鋸齒高者三四尺其花色紫入藥用
花瓣勿見火○百草鏡云玫瑰花立夏前採含苞
未放者陰乾用忌見火

氣香性溫味甘微苦入脾肝經和血行血理氣治

本草綱目拾遺
風痺○藥性考云玫瑰性溫行血破積損傷瘀痛
浸酒飲益

治吐血玫瑰膏 救生苦海用玫瑰花一百朶初
開者去心蒂河水二盃煎半再用河水一盃煎半
去渣和勻共有盃半復煎至一盃白糖一筋收成
調膏不時服之

噤口痢 用玫瑰花陰乾煎服

治乳癰玫瑰花七朶母丁香七粒無灰酒煎服自
愈

腫毒初起 百草鏡玫瑰花去心蒂焙爲末一錢

好酒和服

乳癰初起 鬱症宜此 百草鏡玫瑰花初開者

陰乾燥者三十朶去心蒂陳酒煎食後服

肝胃氣痛 用玫瑰花陰乾沖湯代茶服

新久風痹 百草鏡玫瑰花去淨蕊蒂陰乾三錢

紅花全當歸各一錢水煎去渣好酒和服七劑除

根永不再發

吐紅 集聽用玫瑰花不拘多少去蒂搗汁熬膏

本草綱目拾遺 卷一
三
貯瓶內每早空心茶匙挑四五匙白滾水沖服一
二日卽愈

少林拳經玫瑰花能治跌打損傷

風痹藥酒 救生苦海用白槿花大紅月季花玫

瑰花去蒂各一兩鬧羊花五錢風茄花五朶龍眼
肉北棗肉各一兩紹酒五壺浸封七日隔水煮之
罈上置白米一撮米熟成飯爲度取出每服二三
杯蓋暖臥避風卽愈

保真丸 朱排山相園小識保真丸能通經絡和

百脈壯腰腎健脾胃加飲食健步履除一切痼疾
能固真元用玫瑰花去蒂摘瓣以竹紙糊袋裝之
薄攤曬乾取淨末一筋不宜見火此花色能益血
香能補氣妙難盡述補骨脂一筋淘淨泥土用芪
朮苓甘各五錢煎汁一盃拌曬以汁盡曬燥炒兔
絲子一筋用芎歸芍生地各五錢煎汁去渣以汁
煮兔絲子俟吐絲爲度曬乾炒胡桃仁六兩連皮
搗如泥杜仲四兩鹽水炒去絲韭子四兩淘淨微
炙炒各爲細末煉蜜爲丸如桐子大每晨空心白

本草綱目拾遺 卷一
湯服四錢忌羊肉芫蕪並諸血一方加魚膘四兩
男婦共服可以種子極效或加鹿角膠枸杞子

金雀花

一名黃雀花似六月雪而本高正二月開花色黃
根有刺根入藥○花鏡金雀花枝柯似迎春葉如
槐而有小刺仲春開黃花其形尖旁開兩瓣勢如
飛雀可愛其花鹽湯焯過控乾入茶供○百草鏡
金雀花生山土中雨水時開花色黃而香形酷似
雀白花者名銀雀最難得其莖有白點花後發葉

碎小葉下有軟刺取根入藥去外黑皮及內骨用
別有霞雀花更不可得○嘉興府志金雀一名飛
來鳳鹽浸可以點茶○成化四明志金雀兒花產
奉化○丁未余館奉化劉明府署時明府幼孫患
痘不起發醫用金雀花詢其故云此藥大能透發
痘瘡以其得先春之氣故能解毒攻邪用花

性平和血祛風入肝脾二經亦入乳癰用 百草
鏡跌撲傷損以金雀花乾者研一錢酒下

根 治跌打損傷又治咳嗽煖筋骨療痛風性能

本草綱目拾遺 卷一
追風活血兼通血脈消結毒○濟世良方金雀根
搗汁和酒服渣罨傷處治跌打損傷

金蓮花

廣羣芳譜出山西五臺山塞外尤多花色金黃七
瓣兩層花心亦黃色碎蕊平正有尖小長狹黃瓣
環繞其心一莖數朶若蓮而小六月盛開一望徧
地金色爛然至秋花乾不落結子如粟米而黑其
葉綠色瘦尖而長五尖或七尖○五臺山志山有
早金蓮如真金挺生陸地相傳是文殊聖蹟○張

壽莊云五臺山出金蓮花寺僧採摘乾之作禮物
餉客或入寺獻茶盞中輒浮一二朵如南人之茶
菊然云食之益人 查慎行人海記早金蓮花五
臺山出瓣如池蓮較小色如真金曝乾可致遠有
分餉者以點茶一甌置一朵花開沸湯中新鮮可
愛後扈從出古北口外塞山多有之開花在五六
月閒一入秋莖株俱萎矣○金蓮花出五臺山又
名旱地蓮一名金芙蓉色深黃味滑苦無毒性寒
治口瘡喉腫浮熱牙宣耳疼目痛煎此代茗

明目解嵐瘴軒恕疔瘡大毒諸風

山海草函

佛桑花

粵語佛桑枝葉類桑花丹色名朱槿一名福桑又名扶桑重臺者曰愛老多以爲蔬綱目木槿後有扶桑條止載外治故補之

吳震方嶺南雜記扶桑粵中處處有之葉似桑而略小有大紅淺紅黃三色大者開泛如芍藥朝開暮落落已復開自三月至十月不絕佛桑與扶桑正相似而中心起樓多一層花瓣今人以扶桑佛

桑混一非也紗緞黑退變黃搗扶桑花汁塗之復黑如新

潤容補血

粵語

美顏潤血

陳述齋瑣語朱槿花蒸醋食之粵中婦女多以此美

姿敏按兩粵瑣語載朱槿與佛桑皮微有異云朱

槿一名日及亦曰舜英葉如桑光潤而厚高止四五尺而枝婆婆娑自仲春花至仲冬一叢之上日開數百朶朝開暮落色深紅五出大如蜀葵瓣捲起勢若飛颺層出如樓子有蕊一條比瓣稍長上綴金屑日光所爍疑有火焰粵女多種之插枝卽生

蘇子瞻詩焰焰燒空紅佛桑謂朱槿也然佛桑又有殷紅水紅黃紫各色比朱槿差小稱小牡丹四時有花白者以爲蔬菜甜美可口女子食之尤宜據陳述齋所云則佛桑與朱槿一類而二物要其功用亦不甚遠故粵語以爲卽朱槿今並附錄其功用以補李氏所未備

寶珠山茶

雲溪方以落地花仰者爲貴山茶多種以千葉大紅者爲勝入藥○百草鏡山茶多種惟寶珠入藥

其花大紅四瓣大瓣之中又生碎瓣極多味瀼二
三月採陰乾用之若俱是大瓣千葉者名洋茶不
入藥單瓣者亦不入藥羣芳譜寶珠山茶可代鬱
金研末麻油調塗湯火灼傷

味微辛甘性寒破血消癰跌打吐血症用之又治
腸風瀉血湯火傷鼻衄灸瘡均焙研七朶空心酒
服○百草鏡云涼血破血止血瀼劑也消癰腫跌
撲斷久痢腸風下血崩帶血淋鼻衄吐血外敷灸
瘡

本草綱目拾遺 卷一
赤痢 救生苦海用大紅寶珠山茶花陰乾爲末
加白糖拌勻飯鍋上蒸三四次服

鼻中出血 何明遠方千葉大紅山茶花二三月
采陰乾用時取五六朶煎服卽止 又張氏必效
方鼻衄用寶珠山茶大紅者焙研三五錢砂糖滾
水和服

吐血咳嗽 不藥良方寶珠山茶瓦焙黑色調紅
砂糖日服不拘多少 又方寶珠山茶十朶紅花
五錢白芨一兩紅棗四兩水煎一盃服之渣再服

紅棗不拘時亦取食之

蔣儀藥鏡拾遺賦山茶花吐血衄血腸風下血之
良將

朱春暉云曾見有人患乳頭開花欲墜疼痛異常
有教以用寶珠山茶焙研爲末用麻油調搽立愈
痔瘡出血 汪子明方用寶珠山茶研末沖服

粉團花

根附

有大小二種其花千瓣成簇大者曰玉粉團初青
後白小者曰洋粉團青色轉白白後轉紅藍色入

藥用大者

性寒熏臭蟲同水龍骨雷公藤和燒熏之立除
百
草鏡

洗腎囊風 姚伯玉方用粉團花七朶水煎洗○

良方集要用蛇牀子牆上野苧琇球花煎湯洗之
根 治喉爛 傳效方取入土內者好醋磨以翎
毛蘸掃患處涎出愈

玉簪花

綱目玉簪條載根葉之用獨不言其花今人取其

會蕊實鉛粉其中飯鍋上蒸過云能去鉛氣且香

透粉內婦女以勻面無黥痣之患

其葉乾之熏壁蝨絕跡

花性微毒治小便不通彙集方玉龍散中用之

治癬第一靈丹

寶誌遺方鮮玉簪花三百朶爲

泥母丁香六兩沈香四兩冰片三錢麝三錢山西

城磚十二兩共爲末用眞麻油三觔半熬熟陳年

石灰半觔滴水成珠爲度候冷收瓷罐內黃蠟封

固埋土內二十一日取出敷患處自愈此藥可久

貯勿使洩氣

五車雜錄 卷一
治杖破 玉簪花手排熟貼傷處

清涼膏 張卿子祕方貼疔瘋毒大黃黃柏黃連

黃芩鬱金皮消白芨獨腳蓮天花粉玉簪花共研
細末雞子清調敷留頂 又二香追毒飲治肚心

癰羌活連翹紫蘇甘草白芷防風銀花天花粉肉
桂黃芪乳香木香沈香芍藥生地枳殼黃芩柴胡
前胡茯苓玉簪花水煎食後服

山海草函玉簪花入韶粉內敷疔瘡蛙梗

玉龍散 治小便不通用玉簪花蛇蛻各二錢工

香一錢共爲末每服一錢酒調送下

醫學指南

玉蘭花

瀕湖綱目辛夷集解下惟云有花白者人呼爲玉蘭並不另立主治卽辛夷亦用苞蕊不及其花之用也今采龍柏藥性考補之

性溫香滑消痰益肺和氣蜜漬尤良

痛經不孕 良方集要玉蘭花將開未足每歲一朶每日清晨空心水煎服

丁香花

未詳形狀藥性考

味辛微溫審茶弔露清利頭目

紫茉莉

此草二三月發苗莖逢節則粗如骨節狀葉長尖光綠前銳後大小暑後開花有紫白黃三色又有
一本五色者花朝開暮合結實外有苞內含青子
成簇大如豌豆久則黑子內有白粉宿根三年不
取大如牛蒡味微甘類山藥 陳扶搖花鏡紫茉莉
莉一名狀元紅本不甚高但婆婆娑而蔓衍易生葉

似蔓菁○按紫茉莉入夏開花至深秋未已白花者香尤酷烈其花見日卽斂日入後復開亦不經久一日卽萎西人有食之者去其外皮鹽漬以佐饌云能去風活血無濁淋等症然其性秉純陰柔中帶利久食恐骨軟陽虛人尤忌之性惡鐵凡取用忌鐵器

根治乳癰白濁 花可浸酒 子名土山柰取其粉可去面上癩痣粉刺 性寒 藥性考

野薔薇

本草綱目拾遺 卷一
百草鏡山野與家種無異但形不大花皆粉紅色
單瓣無千葉者春月山人採其花售與粉店蒸粉
貨售爲婦女面藥云其香可辟汗去黧黑○花鏡
野薔薇一名雪客葉細而花小其本多刺蔓生籬
落閒花有純紅粉紅二色皆單瓣不甚可觀但香
最甜似玫瑰人多取蒸作露採含蕊拌茶亦佳患
瘡者烹飲卽愈 六研齋筆記通元子服餌法春
時服薔薇嫩頭一月卽可每日服信三釐漸增至
一分卽可入水坐臥不病如是經年卽可蠟塗身

體挾利刃潛遊江湖劫睡龍之珠得珠而行空自
如觸石無礙三界八寰可縱浪矣此飛仙之業也
而始於嚙薔薇頭談此於客未有不胡盧而笑
花治瘡○伍涵芬讀書志白野薔薇花拌茶煎服
可驅瘧鬼○婦人鬱結吐血○劉克中云香烈大
耗真氣虛人忌服之

根治肺癰吐膿痰酒煎服口瘡煎湯漱口○子名
石珊瑚治產後軟癱○婦人禿髮用薔薇嫩枝同
猴薑煎汁刷之

秋海棠

嶺南隨筆海棠本無香惟清遠歸猿洞秋海棠肇
慶羶羊峽春海棠其香特盛○羣芳譜一名八月
春草本花色粉紅甚嬌豔葉綠如翠羽此花有二
種葉下紅筋者爲常品綠筋者開花更有雅趣○
大觀錄秋海棠亦名斷腸草其根葉有毒犬馬食
之卽死浸花水飲之害人○漳州府志秋海棠歲
每生苗其莖甚脆葉背作紅亂紋云是相思血也
相傳昔人有以思而噴血階下遂生此故亦名相

思草其花一朶謝則旁生二朶二生四四生八具
太極象雅豔異常○花鏡秋海棠一名八月春爲
秋色中第一本矮而葉大背多紅絲如胭脂作界
紋花四出以漸而開至末朶結鈴子生椹枝花嬌
冶柔媚其異種有黃白二色一名斷腸花○周開
鄂云秋海棠俗傳其花中黃心有大毒人食多死
予一日悞食此驚惶一夜倉卒旅邸無藥可解但
委命聽之而已次日亦無恙丁憲榮云秋海棠葉
初生山左小兒爭采食之味微酸生津能益唇色

本草綱目拾遺 卷十
如塗朱然則其無毒可知。藥性考海棠喜背陰而生故性寒凡大熱症可用

味酸性寒無毒和蜜搽面澤肌潤肉其幹搗汁治

咽喉痛

藥性考

百草鏡云擦癬殺蟲用葉花浸蜜入

婦人面藥用。物理小識白銀以烏梅三葉酸秋海棠葉皆可

海棠蜜 救生苦海紅秋海棠採花去心白蜜拌勻蒸曬十次令化爲度冬月早晨洗面後敷之能令色豔并治吹花癬疥癩。慈航活人書有製海

棠蜜法上白蜜一大杯紅秋海棠現取花片用拌入蜜內將花略搗爛日日曬或蒸數次自爛如泥其蜜色如海棠或加入好芙蓉粉少許光絕可愛且免面皮凍裂

茶菊

城頭菊

金鈴菊

金

箭頭

菊米

菊根

茶菊較家菊朶小多心有黃白二色杭州錢塘所屬良渚檜葬地方鄉人多種菊爲業秋十月采取花挑入城市以售黃色者有高腳黃等名色紫蒂者名紫蒂盤桓白色千葉名千葉玉玲瓏徽人茶

舖多買焙乾作點茶用常中丞安宦遊筆記鳳凰
山產菊花不甚大蒂紫味甘取以點茶絕佳又浙
省城頭一帶產菊名城頭菊皆生城上石縫中至
秋開花花小於茶菊香氣沁腹點茶更佳此則茶
菊之野生者性味不同臨安山中所產一種野菊
名金鈴菊花小如豆與城頭菊彷彿山人多采入
藥舖作野菊花用實與野菊又不同野菊食之瀉
人而鈴菊又不作瀉野菊瓣疎此則旁瓣密爲別
也瀕湖綱目菊分家野而此數種獨未言及今杭

俗以茶菊作餉遺客爲用最廣予故不惜覩縷言之兼補瀕湖所未備焉○百草鏡云甘菊卽茶菊出浙江江西者佳形細小而香產於亳州者不可用白而微臭近日杭州笕橋安徽池州紹興新昌

唐公市湖北

缺

州皆產入藥用陰乾者去蒂以白

朮枸杞子地骨皮爲使反河鮑及無鱗魚園菊花大不入藥止可裝枕去風其根治疔腫卻效○羣芳譜一名眞菊一名家菊一名茶菊花正黃小如指頂外尖瓣內細萼柄細而長味甘而辛氣香而

烈葉似小金鈴而尖更多亞淺氣味似薄荷枝幹
嫩則青老則紫實如葶藶而細種之亦生苗人家
種以供蔬茹凡菊葉皆深綠而厚味極苦或有毛
惟此葉淡綠柔莖味微甘咀嚼香味俱勝擷以作
羹及泛茶極有風致○萬厯嘉善縣志花黃梗紫
爲甘菊最良野菊叢生花小性涼家菊花大氣弗
聚矣○黃茶菊以紫蒂爲佳明目去風搜肝氣治
頭暈目眩益血潤容入血分○食物宜忌黃菊花
卽甘菊花苦微甘性平益肺腎去風除熱補血養

目清眩運頭風○白茶菊千葉者佳通肺氣止欬
逆清三焦鬱火療肌熱入氣分其根治疔腫喉疔
喉癰○海甯出茶菊名金井玉欄杆其花心黃邊
白點茶絕佳○聖惠方云黃甘菊雖能燥溼祛風
亦能助火泄氣

性平專入陽分治諸風頭眩解酒毒疔腫

撲打損傷○王阮亭居易錄云四川提督吳英說
昔得撲打損傷祕方雖重傷瀕死但一絲未絕灌
下立甦其方以十一月采野菊花連枝葉陰乾用

本草綱目拾遺 卷一
時取一兩加童便無灰酒各一盃同煎熱服

紅絲疔 立效驗方以白菊花葉無白者別菊亦可冬月無葉取根加雄黃錢許蠅蚰二條共搗極爛從頭敷至絲盡處爲止用絹條裹緊隔夜卽清眞神方也

城頭菊

朱排山柑園小識杭城石罅生菊枝葉極瘦小九月開花如豆香而且甘雍正初禁人采取以充貢品宮闈以作枕城上之菊旣爲野生而味甘亦一

異也蘇頌圖經云有一種開小小花瓣下如珠子
謂之珠子菊豈卽此歟

明目去頭風喉痹癰毒涼血其枝葉鮮者生搗罨
疔瘡并服其汁兼治蛇咬瘰癧梅瘡眼癰煎洗天
泡瘡亦效

金鈴菊

百草鏡云采花乾之作枕除頭風目疾內熱洗風
火眼止熱瀉搗罨一切腫毒諸蟲咬螫有效胃虛
便滑無實熱者忌用以其苦寒傷胃能作瀉也○

羣芳譜載金鈴菊花小如鈴其榦長與人等凡菊
葉皆五出此葉獨尖長七出花與葉層層相間不
獨生於枝頭此乃家種金鈴菊非野生金鈴菊也
然功用要亦彷彿

金箭頭

馬伯州菊譜花長而末銳枝葉可茹名金箭頭又
名風藥菊專治頭風較他菊十倍

菊米

處州出一種山中野菊土人采其蕊乾之如半粒

菜豆大甚香而輕圓黃亮云敗毒散疔去風清火
明目爲第一產遂昌縣石練山

菊根

張介賓本草正云白菊根善利水搗汁和酒服之
大治癰閉

瘰癧未破 醫學指南採野菊根搗爛煎酒服渣
塗上自消不消自破

睡蓮

廣志睡蓮布葉數重葉如荇而大花有五色當夏

畫開夜縮入水底晝復出與夢草晝入地夜卽復
出相反廣州有之諺曰毋佩睡蓮使人好眠綱目
蔬部載睡菜而睡蓮獨遺故補之○張黻大觀錄
綽菜夏月生於池沼之間葉類茨菰根如藕條食
之令人思睡又名暝菜○嶺南雜記睡蓮菜一名
瑞蓮花瓣外紫內白榦如叙股心似雞頭以水淺
深爲短長日沈夜浮必雞鳴采之始得出高州

佩之多好眠

廣志

清香爽脆消暑解醒

嶺南雜記

瑞香花

粵語乳源多白瑞香冬月盛開如雪名雪花刈以爲薪雜山蘭芎藭之屬燒之比屋皆香其種以攀枝爲上有紫色者香尤烈雜眾花中眾花往往無香皆爲所奪一名奪香花乾者入藥用綱目芳草內瑞香條止載其根治急喉風用白花者研水灌之亦不言其花之功用故補之

稀痘治乳岩初起

藥性考瑞香花馥糖餞芳甘清利頭目齒痛宜含

子午蓮

綱目水草部入蘋以爲此卽大葉之蘋也古人以爲食品祭用蘋蘩卽此今浙人呼爲子午蓮生水澤陂蕩中葉較荷而小缺口不圓入夏開白花午開子斂子開午斂故名采花入藥

治小兒急慢驚風煎湯服用七朶或十四朶杭城張子元扇店施此救人多年矣

桃金孃

粵志草花之以孃名者有桃金孃叢生野閒似梅而末微銳似桃而色倍蘋中莖純紫絲綴深黃如

金粟名桃金孃八九月實熟青紺若牛乳狀產桂林今廣州亦多有之粵歌云攜手南山陽采花香滿筐妾愛留求子郎愛桃金孃○花鏡金絲桃一名桃金孃出桂林郡花似桃而大其色更赭中莖純紫心吐黃鬚鋪散花外儼似金絲八九月實熟青紺若牛乳狀味甘可入藥用如分種當從根下劈開仍以土覆之至來年移植便活

花行血

子味甘入脾養血明目

假素馨

出廣中青藤仔花也。○粵語青藤仔葉長三四寸多芒刺莖大如指而堅韌人家日用之猶北地之用柳條

煎湯洗瘡疥良

千金花

此卽千金草花千金草卽本經蘭草今所呼孩兒菊省頭草是也二月宿根再發紫莖素枝赤節綠葉對節生光澤有歧嫩時可掇可佩八九月漸老

枝頭成穗作花紅白狀似雞蘇久之花瓣轉白絨裂如毬毬中有子一粒絨著子上色黑味苦臭香氣裂卽千金花也瀕湖綱目僅載其葉之用本草乘雅云以千金花煮酒臭類木香苦甚黃連用治滯痢獲效頗捷予故采其說入花部以補所未備花氣香味苦浸酒治滯下以其能闢辟不祥利水道宣氣四達之功耳

乘雅

梧桐花

山海草函治杖丹癩頭湯火傷

金鳳毛

汪連仕云今人呼翠翎草翠遶如翎細葉塌地而生與翠雲草鳳尾不同敏按此種卽蔦蘿今人編竹爲亭臺植之盆中秋開大紅小花者是也

治耳疔痔漏

十姊妹

一名佛見笑汪連仕云取其根葉陰乾爲末蜜糖湯調服治傷寒危篤立效乃元升觀之祕方

雨韭

汪連仕草藥方云兩韭生水澤旁卽青茨菇花去溼之功同茵陳

散一切疔腫消痔漏明目

罌粟子油

固精物理小識

佛前舊供花

雲谷醫抄治賺瘡爛腿用佛前多年陳久供花取來用香油浸貼卽愈

本草綱目拾遺果部上目錄

延壽果

櫻額

倒吊果

飛松子

茶朮子

椰油

椰中酒 椰皮 椰膏

椰肉

宜母果

天師粟

卽娑羅子

化州橘紅

橘瓢上絲 糖橘紅 青鹽陳皮

橘餅 藥

荳蔻檳榔

瑣瑣蒲萄

南棗

山棗 藏棗

落花生

油

核桃油

阿月渾子

薯良

無漏果

胖大海

藕粉

節粉 八仙藕粉

菱粉

蒂殼

芡粉

果部上

延壽果

乃鹿銜草之子又松潘衛志有延壽果云果生於
土味甜似山藥並無樹果此或名同而物異也○
按鹿銜千金方名鹿藥草其葉大而面綠背青者
爲真蘇恭言有大小二種保昇言葉似茺蔚叢生
有毛者吳風草也此草惟生於秦地者有子土人
名曰延壽果

仁恕堂筆記張掖河西地有草根一種形如黃連

盤根屈曲有若缺然邊人取之實籩豆用之供餽

遺名曰延壽果俗又稱鹿跑草其味甚甜

理血中邪溼温補下元去風痺癰瘡痛小兒食之

定驚悸

三邊紀略

本草逢原云味微濇而甘不特有

益老人而嬰兒先天不足者尤爲上藥惜乎南方罕得也

櫻額

果屬也產關東烏喇口外其樹叢生果形如野黑蒲萄而稍小鮮實甚美曬乾爲末可以致遠○盛

京志一名稠梨子實黑而澀土人珍之閒以作麪
暑月調水服之可止瀉

按宦遊筆記郁李卽棠棣結子如櫻桃南產者酸
澀不堪食盛京出者又名櫻額味甘鮮曬乾爲末
更佳

味甘澀性溫煖補脾止洩瀉

倒弔果

御製幾暇格物編俗名弔搭果形似山梨而小體微
長味酢肉多沙長蒂諸果始生時皆向上此果花

本草綱目拾遺 卷一
實皆下垂故名生時堅澀熟乃沙樹枝葉俱如梨
爲秦中物產今遵化沿邊有之而考之書籍草木
諸譜皆不載倒弔之名惟上林賦云答逌離支答
逌音近打拉張揖注云答逌果名按梅堯臣牡丹
詩用打拉二字北人方言以欹垂爲打拉是答逌
名果或因其下垂也說文海篇俱作榕櫨果今名
弔搭或是答逌音之轉耳
性暖利胸膈健脾消食

飛松子

雲南土司志邊境各土司深山中產一種飛松子
結實熟時人欲取之子輒飛去夜則仍歸根下土
人記其處俟夜過子掘其根而取之饋遺以爲珍
品味絕香美○徐霞客遊記飛松一名狐實亦作
梧桐實正如梧桐子而大倍之色味亦如梧桐子而
殼薄易剝坐密樹中一見輒伐樹乃可得遲則樹
卽存而子俱飛去成空株矣故曰飛松惟巔堂關
外野人境有之其葉如柳味絕類土豆○滇略梧
實大如豆殼脆易剝不與他處類俗謂之山松子

本草綱目拾遺 卷十
亦曰飛松○朱排山柑園小識飛松出滇南似梧桐子稍大而微長內外色味俱肖而香美過之蔓生松樹上土人甚珍之

下氣消痰通和血脈能返魂凡有人魂神不安及驚越失魂神不守舍一切等症此爲要藥故靈璧趙氏天王補心丹治怔忡用之張棗猗言十香返魂丹加飛松子殼更效

茶朮子

邊輿考其樹出遼東塞外高有三尺許葉如南方

棟樹背有黃白點花四出形如手碧色或有八出者結子大如拳熟便可食其甘如飴其樹浸水可爲油燃燈入藥用子

治一切病遼塞無藥土人有病者取茶朮子啖之卽愈

椰油

椰中酒 椰膏
椰皮 椰肉

臺灣使槎錄云可佐膏火或云用火炙椰其油自出凡揀椰子以手搖之聽水聲清亮則心大而甜其肉厚水聲濁則否○澆水燕談錄椰子生安南

及海外諸國木如椶櫚大者高百餘尺花白如千葉芙蓉一本花不過三五顆其大如斗至差小外有黃毛軟皮中有殼正類檳榔殼上有二穴牙出穴中殼內類蘿菔皮味苦肉極甘脆蠻人甚珍之○劉恂嶺表錄異椰殼中有液數合如乳亦可飲之冷而動氣○廣果錄椰樹高六七丈直竦無枝至木末乃有葉如束蒲長二三尺花如千葉芙蓉白色終歲不絕葉閒生實如瓠繫房房連累一房二十七八實或三十實大者如斗有皮厚苞之曰

椰衣皮中有核甚堅與膚肉皆緊著皮厚可半寸
白如雪味脆而甘膚中空虛又有清漿升許味美
於蜜微有酒氣曰椰酒蘇軾詩美酒生林不待儀
言椰中有自然之酒不待儀狄而作也○廣東名
勝志文昌縣玉陽山椰子最多大三四圍高二三
丈通身無枝至百餘年纔有葉三月花連著實房
房三十或二十七八子至六月熟七月收

療齒疾凍瘡

粵志

祛暑氣

華夷花木考

治消渴塗髭髮立

黑

澠水燕談錄

椰中酒 食物考緬甸有樹頭酒卽椰子中漿汁也華夷花木考載林邑王與南越王有怨遣刺客匕其首梟之樹上化爲椰子樹當刺時王方大醉故椰漿如酒飲之醉人

祛風消水腫止吐血塗頭黑髮然多食昏人動氣增渴性溫故也久服可烏鬚食物考

椰膏 粵載椰子殼土人取以熬膏色黑如漆塗

癬良

椰皮 煮汁止血療吐逆澗水燕談錄

椰肉 益氣生風

澠水燕
談錄

楊梅下疳筋骨疼痛

不藥良方椰子殼燒存性

臨燒以滾酒泡服二三錢暖臥取汗其痛卽止

宜母果

嶺南雜記似橘而酸又名宜濛子○元吳萊有宜

濛熱水歌○粵語宜男子似橙而小二三月熟黃

色味極酸孕婦肝虛嗜之故曰宜母元時於廣州

荔支灣作御果園栽種里木樹大小八百株以作

渴水里木卽宜母子也一名黎濛子吳萊詩廣州

園官進渴水天風夏熱宜濛子百花醞作甘露漿
南園烹成赤龍髓蓋以里木子榨水煎糖也蒙古
以爲舍里別卽渴水也一名藥果當熟時人家競
買以多藏而經歲久爲尙汁可代醋染大紅以其
汁調乃上○藥性考黎濛子大如梅形似橘孕婦
宜食能辟暑卽宜濛子孕婦食之能安胎故又名
宜母

醃食下氣和胃懷孕不安食之良製爲漿辟酷暑
又能解渴○宜母子以鹽醃歲久色黑可治傷寒

痰火

粵語

天師粟

卽娑羅子

一名娑羅子治胃痛最驗綱目於主治下失載○
通雅娑羅外國之交讓木也葉似柟皮似玉蘭色
葱白最潔鳥不棲蟲不生子能下氣○益部方物
記生峩崑山中類枇杷數葩合房春開葉在表花
在中或言根不可徙○吳船錄木葉如海桐又似
楊梅花紅白色春夏閒開長安客話臥佛寺內娑
羅樹二株子如橡栗可療心疾○宸垣識略娑羅

花苞大如拳葉似枇杷凡二十餘葉相沓捧苞類
桐花一簇三十餘朶經月方謝○留青日札娑羅
樹出西番海中予在潯州時官圃一株甚巨每枝
生葉七片有花穗甚長而黃如栗花秋後結實如
栗可食正所謂七葉樹也藥性考娑羅子一枝七
葉九葉苞如人面花似牡丹香白

肉味苦微涼寬中下氣治胃脘肝膈膨脹痞積瘧
痢吐血勞傷平胃通絡用陰陽瓦炙灰或酒煨食
俱效單用不入他藥或稱天師栗非也○葛祖遺

方味甘溫無毒治心胃寒痛蟲痛性溫殺蟲

胃痛○百草鏡用莎婆子卽娑羅子也以一枚去

殼擣碎煎服能令蟲從大便出三服除根

九種心痛 楊春涯驗方娑羅子卽武吉燒灰沖

酒服

化州橘紅

橘瓢上絲
製柑橘餅

糖橘紅
青鹽陳皮

橘餅
橘苓 藥

嶺南雜記化州仙橘相傳仙人羅辨種橘於石龍

之腹至今猶存惟此一株在蘇澤堂者爲最清風

樓次之紅樹又次之其實非橘皮厚肉酸不中食

其皮釐爲五片七片不可成雙每片眞者可值一金每年所結循例具文報明上臺屆期督撫差親隨跟同採摘批製官斯土者亦不多得彼土人云凡近州始聞譙樓更鼓者其皮亦佳故化皮贖者多眞者甚難得○關涵嶺南隨筆化州署橘樹一月生一子以其皮入藥痰立解後爲風折卽其地補種氣味便殊今稱化州橘紅者皆以增城香柚皮僞代之能化物而不能自化○粵語化州有橘一株在署中月生一子以其皮爲橘紅瀾湯飲之

痿立消曩亦進御今爲大風所拔新種一株味不
及化州故多橘紅售於嶺內而產署中者獨異○
本草葉雅云橘柚專精者實實復專精者皮皮布
細竅宛如人膚卽脈絡肉理筋膜于核各有屬焉
故力能轉入爲升轉升爲合卽轉合爲開也種種
形證悉從入從合故胸中瘕熱水穀失宣神明不
通氣逆及氣臭耳下氣者出已而降玉衡機轉之
妙用也○識藥辨微云化橘紅近日廣中來者皆
單片成束作象眼塊或三十五十片兩頭以紅繩

紫之成一把外皮淡紅色內腹皮白色周身亦有
豬鬃皮此種皆柚皮亦能消痰又有一種爲世所
重每個五片如爪中用化州印名五爪橘紅亦柚
皮所製較掌片爲佳究之眞者遠甚也眞化州橘
紅煎之作甜香取其汁一點入痰盂內痰皆變爲
冰此爲上品○梁氏家藏蘇澤堂化州橘紅每一
個七破反摺作七歧曬乾氣甚香烈有橘紅歌云
石龍靈異不可測首向青霄尾潛澤有時聲吼洪
如鶯有時噴沙白似雪鳴或宰相應期生鳴或科

甲蟬聯翼由來州牧履其常惟恐怪奇駭愚俗亭
碑鼓吹鎮其頭重鑊纍石填其穴天生靈異無可
憑離奇屈曲化爲橘橘之爲性溫且平能愈傷寒
兼積食消痰止嗽功更奇誰先辨此眞龍脈價值
黃金不易求寄語人間休浪擲

治痰症如神消油膩穀食積醒酒寬中氣虛者忌

服解鱉毒

慈惠編食鱉中
毒橘紅煎湯服

辰砂五香丸 治翻胃噎膈嘔吐張氏祕效方用

血竭乳香沒藥辰砂各一錢五分元胡一錢化州

橘紅一錢共爲末每三分酒服

羊癲瘋 良方集要雄黃天竺黃川貝母各五錢

眞琥珀一錢麝香一錢陳膽星一兩以上各另研
全蠍十四個去足酒洗遠志肉甘草汁製釣藤防
風化州橘紅薑衣羌活茯苓天麻石菖蒲各五錢
以上不可見火曬乾蟬蛻三十個白附子六錢共
爲末煉蜜爲丸如龍眼大每服一丸開水下

按百草鏡廣東高州府化州出陳皮去白者名橘
紅今亦罕得土人以柚皮代之出售外方價亦不

貴辨辨之法須先看皮色筋味如皮皺粗色黃而
厚內多白膜味反甜帶辛者乃乳柑皮也只堪點
茶不堪入藥皮極厚而泡鬆紋極細而色黃內多
膜無筋味甜多辛少者乃柚子皮也性忌冷服紋
細色紅潤而皮薄多有筋脈味苦辛入口芳香者
乃真化州橘紅也入藥以此種爲貴然其性酸削
能伐生氣消痰雖捷破氣損人不宜輕用近日有
一種產仁和塘棲鎮蜜橘皮所製曰甜橘紅清香
大肺醒脾消痰之功不下化產而性不峻削名爲

本草綱目拾遺 卷十 十一
香金板南人體弱者宜之○本草乘雅武林棲水
出蜜橘凡數十品名金錢穿心者雖秀色可觀又
不如佛肚臍形小皮癩甘美可口霜降采取氣足
味足密藏至春剖皮抽脈破囊吮汁亦可振醒精
神爲得句破疑之助

橘瓢上絲

金御乘云橘絲專能宣通經絡滯氣予屢用以治
衛氣逆於肺之脈脹甚有效綱目橘瓢上筋膜只
引大明治口渴吐酒而沒其專功何耶因仍其說

以補之

通經絡滯氣脈脹驅皮裏膜外積痰活血

糖橘紅

仁和塘棧鎮者佳以皮去白切小塊用糖霜製

味甘辛性溫理氣快膈治嗽消痰

食物宜忌

橘餅

閩中漳泉者佳名麥芽橘餅圓徑四五寸乃選大福橘蜜糖釀製而成乾之面上有白霜故名肉厚味重爲天下第一浙製者乃衢橘所作圓徑不及

本草綱目拾遺 卷十
三寸且皮色黯黑而肉薄味亦苦劣出塘棲者爲
蜜橘餅味差勝然亦不及閩中者又興化出金錢
橘餅乃取金橘製成小如錢明如琥珀消食下氣
開膈捷於砂仁荳蔻又可醒酒醉後點茶允爲妙
供

味甘性溫下氣寬中消痰運食

食物宜忌

黃疸臃脹除

膈止消

經驗廣集

治諸色痢

行篋檢祕橘餅一兩圓眼肉五錢冰

糖五錢水二盃煎一盃露一宿溫服不露亦可至

重者不過二三服無不神驗

治瀉

梁氏集驗夏月喫瓜菓太多以致洩瀉不

休用漳州好橘餅一枚細切薄片作二次放茶鍾

內沖服○橘餅湯

經驗廣集治傷食生冷瓜菓

泄瀉不休橘餅一個切薄片放盃內以沸湯潑蓋
住泡汁出卽飲湯連餅食一餅可作數次服

百菓酒

香櫞佛手各二個核桃肉圓眼肉蓮肉

橘餅各半筋柏子仁四兩松子三兩紅棗二十兩
黑糖三筋乾燒酒五十筋浸此酒補虛益腎乃河

中李太守祕方

藥製柑橘餅

北硯食規用元明粉半夏青鹽百藥草天花粉白
茯苓各五錢訶子甘草烏梅去核各二錢礪砂桔
梗各三錢以上俱用雪水煎半乾去渣澄清取湯
煮柑橘炭墜微火烘日翻二次每次輕輕細捻使
藥味盡入皮內如捻破則不妙能清火化痰寬中
降氣

青鹽陳皮

百草鏡製青鹽陳皮卽蘇州宋公祠遺法也陳皮
二觔河水浸一日竹刀輕刮去浮白貯竹筐內沸
湯淋三四次用冷河水洗淨不苦爲度曬至半乾
可得淨皮一觔初次用甘草烏梅肉各四兩煎濃
汁拌曬夜露俟酥捻碎如豆大再用川貝母去心
四兩青鹽三兩研爲細末拌勻曬露乾收貯
消痰降氣生津開鬱運脾調胃解毒安神

橘苓

橘樹上生如木蓴棗皮紅色

治乳癰煎酒服

荳蔻檳榔

此卽綱目檳榔注內所云蒟子是也形如雞心一頭尖一頭圓僅如小指大外有殼包之殼白色如荳蔻形尖如橄欖長不及半寸藥肆每於荳蔻中檢出每荳蔻一筋不過數粒價亦倍廣南檳榔亦無有專貨之者或云此種始爲雞心檳榔廣南所市者皆山檳榔及大腹子而已時珍循竺氏說以山檳榔爲蒟子恐悞

治反胃噎膈餘功與廣欖榔同

按百草鏡欖榔今藥肆所市者形扁而圓大乃大腹子俗名雌欖榔廣東文昌縣出者名文昌子尖小者名主賜欖榔又名喫子其形長尖狀如雞心內有錦紋又名雞心欖榔卽雄欖榔也另有一種雞心欖榔來自洋船從白荳蔻內揀出極罕有形亦長尖極小外有殼儼如棗核故又呼棗核欖榔入藥最勝

耳聾灸法

經驗廣集用雞心欖榔一個將臍內

本草綱目拾遺 卷十
挖一窩如錢眼大實以麝香坐於患耳內以艾炷
灸之不過三四次即效

小兒疳積 胡開甫方史君子五個生五個熟荳
蔻內檳榔用薑湯磨汁空心蘸史君子肉食一二
次即愈

聾耳出膿

荳蔻檳榔爲末吹入立愈

救生
苦海

口瘡

荳蔻內檳榔煨存性加輕粉敷之

廣果
錄

瑣瑣蒲萄

出土魯番北京貨之形如胡椒係蒲萄之別種也

回疆志蒲萄一根數本藤蔓牽長花極細而黃白
色其實有紫白青黑數種形有圓長大小味有酸
甜不同一種色綠而無核較黃豆微大味甘美一
種色紫而小如胡椒卽瑣瑣蒲萄一種色黑形長
寸許一種色白而大皆七八月熟晾乾可致遠○
本經逢原云瑣瑣蒲萄似蒲萄而瑣細故名生於
漠北南方閒亦有之其榦類木而係藤本其子生
青熟赤乾則紫黑能攝精氣歸宿腎藏與五味子
功用不甚相遠凡藤蔓之類皆屬於筋草木之實

皆達於藏不獨此味爲然此物向供食品不入湯藥故本草不載近時北人以此強腎南人以之稀痘各有攸宜○五雜俎西域白蒲桃生者不可見其乾者味殊奇甘有兔眼蒲桃無核又有瑣瑣蒲桃形如茱萸小兒食之能解痘毒于文定筆塵云瑣瑣卽馭娑之訛○黎媿曾仁恕堂筆記瑣瑣蒲萄于文定引西京羽獵賦謂瑣瑣當爲馭娑固屬附會而以爲別有一種亦非河西蒲萄雖引根牽蔓不異中土而結實大長如馬乳色深紫味亦殊

甘一枝千百顆大者在上細在下垂取而乾之大者爲白蒲萄細者名瑣瑣非兩種也故俗呼爲公領孫惟綠蒲萄則來自西域非中土所有

味甘核細微鹹○痘學真傳云味甘酸性平溫○百草鏡云性熱入脾腎二經作酒彌佳治筋骨溼痛利水甚捷除遍身浮腫痘瘡不出酒研和飲神效

強腎 瑣瑣蒲萄人參各一錢火酒浸一宿侵晨塗手心摩擦腰脊能助膂力強壯若臥時磨擦腰

脊力助陽事堅強尤爲得力

稀痘 瑣瑣蒲萄一歲一錢神黃豆一歲一粒杵
爲細末一陽夜蜜水調服并擦心窩腰眼能助腎
祛邪以北地方物專助東南生氣之不足也然惟
稟質素弱者用之有益若氣壯偏陽者勿服恐其
助長淫火之毒也

按紫桃軒雜綴瑣瑣蒲萄神農九草之一中土久
有不俟博望從西域帶來也吾里東塔朱買臣墓
有之戊子余曾歷平湖幕署有一枝蔓延滿架夏

開瑣碎花結實如棊豆望不可見吾杭螺螄山汪
姓家亦有此然食之味薄不若甘肅者味厚也入
藥自宜以西北者爲優

南棗

山棗
藏棗

出金華東陽縣茶場以透明如血七枚長一尺者
佳陳者入藥○宦遊筆記金華東陽縣茶場出棗
其大如拳核尖細如黍決之卽脫清甘香脆以此
名聞天下明中葉尙存數柯今此種已絕矣惟東
南諸鄉於高阜地種之雖不及茶場亦美甲於他

本草綱目拾遺 卷十 三
處其製法不一未熟輒擊以湯沃之使變色謂之
湯紅乾則其色紫已熟者名樹頭紅乾則其色丹
過熟者以所煮餘汁煮之色味似蔗糖謂之糖棗
此則以時食爲美不作乾也又有一種棘差小而
圓味殊勝棗○物理小識南棗出蘭溪搖而知之
其肉離核

味甘微酸性溫補赤入心酸斂肝

博記單方眼疾中有一種名紅線鎖目乾治法取
南棗核二十一粒將核截兩斷去仁淨以銅綠塞

孔中仍將棗核合上以紙貼封一起放爐中燒紅取出以盃蓋存性每日只用七個研極細末調生男乳水抹三日立效

腸紅下血 南棗五枚同黃芪二錢煎湯五更服神效○又方不藥良方南棗十枚槐米一兩同煎去米食棗日三次卽愈

痔瘡 救生苦海南棗一枚去核鼈頭骨一個搗碎銅青裝滿棗內紮緊火煨烟盡伏土存性研細用秋海棠煎洗然後用藥和水敷之三日消

除壁蝨 集聽大南棗去核入水銀火煨熏

走馬牙疳 不藥良方陳年南棗核燒灰研末摻

之

棗參丸 醒園錄用大南棗十枚蒸軟去皮核配

人參一錢布包藏飯鍋內蒸爛搗勻爲丸如彈子

大收貯用之補氣最捷

仙果不饑方 醒園錄大南棗一觔好柿餅十塊

芝麻半觔去皮炒糯米粉半觔炒將芝麻研成細

末棗柿同入飯中蒸熟取出去皮核子蒂搗極爛

和麻米二粉再搗勻爲丸曬乾收貯加參更妙
本經逢原云古方中用大棗皆是紅棗取生能散
表也入補脾藥宜用南棗取甘能益津也其黑棗
助溼中火損齒生蟲入藥非宜

山棗

出廣西肇慶府葉如梅果似荔枝九月熟可食○
柳貫打棗譜山棗狀如棗而圓色青黃而味甘酸
出廣州

甘溫無毒生和脾胃益血壯神

藏棗

朱排山柑園小識藏棗來自西藏實產於天竺大者長二寸許形味絕似南棗能補氣功同人參藏中亦不易得其核似蠶蛹形而無仁

補虛勞定神志治怯如神

落花生油

一名長生果福清縣志出外國昔年無之蔓生園中花謝時其中心有絲垂入地結實故名一房可二三粒炒食味甚香美康熙初年僧應元往扶桑

覓種寄回亦可壓油今閩省產者出興化爲第一
名黃土味甜而粒滿出臺灣名白土味澀而粒細
其油煎之不熟食之令人瀉一名土豆○彙書近
時有一種名落花生者莖葉俱類荳其花亦似荳
花而色黃枝上不結實其花落地卽結實於泥土
中亦奇物也實亦似荳莢而稍堅硬炒熟食之作
松子之味此種皆自閩中來○物理小識番豆名
落花生土露子二三月種之一畦不過數子行枝
如薤菜虎耳藤橫枝取土壓之藤上開花絲落土

成實冬後掘土取之殼有紋豆黃白色炒熟甘香似松子味又云番豆花透空入土結豆當通潤臟腑○酉陽雜俎又有一種形如香芋蔓生藝者架小棚使蔓之花開亦落土結子如香芋亦名花生○花鏡落花生一名香芋引藤蔓而生葉極開小白花花落於地根卽生實連絲牽引土中纍纍不斷冬盡掘取煮食香甜可口南浙多產之○萬厯仙居縣志落花生原出福建近得其種植之○嶺南隨筆花與葉不相見爲換錦花莢與蒂不相見

爲落花生種法以沙壓橫枝則蔓生花不生莢其
莢別在根莖間亦稱落花生○逢原云長生果產
閩地花落土中卽生從古無此近始有之味甘氣
香能健脾胃飲食難消運者宜之或云與黃瓜相
反予曾二者並食未蒙其害因表出之花生殼韓
柳生云焙研極細末著人身體沾肉卽生奇癢○
敏按劉敞堂經驗祕方長生果一名落花生又名
落地生不可與黃熟瓜同喫喫則立死黃熟瓜卽
香瓜非長而白色可以醃喫之黃瓜也始知俗傳

本草綱目拾遺 卷十 三
之誤○雨蓑翁食物便覽香芋一名落花生久服
多男

多食治翻胃然其性能動火生痰常人只宜少喫
從新云辛甘而香潤肺補脾和平可貴食物宜忌
云性平味甘舒脾廣志云暖胃藥性考云生研用
下痰炒熟用開胃醒脾滑腸乾嗽者宜餐滋燥潤
火

按落花生乃花謝落土感土氣而成實故有入脾
和胃之功又能通肺氣曾見興化令王翁一子酷

嗜此物後患軟癱豈非動火生痰之明驗歟近見
人以花生入糖湯煮浸醬油入素供更爲生痰老
人尤不宜多食

俞友梁有烏鬚簡便方止用落花生淨肉炒極焦
黑研極細搥鬚一二日後色黑如漆

四日兩頭瘡

卽三陰瘡

安定臣云昔曾患此諸方莫

療有人教服炒熟花生每日食一二兩不半月而
愈

玉神庵尼清慧言花生人云服之生痰有一大家

本草綱目拾遺 卷十
婦咳嗽痰多醫束手不治庵尼雲上勸服花生每日食二三兩漸覺稀少不半年服花生二十餘觔咳嗽與痰喘皆除想亦從治之法也童鹿莽言花生本有滌痰之功予家凡患咳嗽止用生花生去殼膜取淨肉沖湯服痰嗽自安豈非化痰之功善於瓜萁貝母世俗以火炒食反能生痰又凡被馬踢傷者忌服花生服之瘡愈增痛

花生油 一名果油色白甘平氣腥滑腸下積膩
膈生痰

核桃油

好者補火若壞核桃榨取者有毒味劣不宜食

阿月渾子

與榛子同類性更溫良能止痢煖腎開胃除腸穢積得木香山莢能興陽

薯蕷

形如柚圓蔓生紅色浸酒服能活血

藥性考

無漏果

此卽海欒乃鳳尾蕉之子或稱爲棗實非棗也以

刀剝去青皮石灰湯瀹之蜜浸瓶封可久藏寄遠
不壞

味甘美性溫消食寬中除痰止嗽益氣潤顏久食
令人肥美

胖大海

出安南大洞山產至陰之地其性純陰故能治六
經之火土人名曰安南子又名大洞菓形似乾青
菓皮色黑黃起皺紋以水泡之層層脹大如浮藻
然中有軟殼核殼內有仁二瓣

味甘淡治火閉痘服之立起並治一切熱症勞傷
吐衄下血消毒去暑時行赤眼風火牙疼蟲積下
食痔瘡漏管乾欬無痰骨蒸內熱三焦火症諸瘡
皆效功難盡述

藕粉

節粉

冬日掘取老藕搗汁澄粉乾之以刀削片潔白如
鶴羽入食品先以冷水少許和勻調次以滾水沖
入卽凝結如膠色如紅玉可愛加白糖霜摻食大
能和營衛生津綱目藕下止載澄粉作食輕身延

年而不知其功用更專益血止血也凡一切症皆
不忌可服養餘月令有澄藕粉法取粗藕不限多
少洗淨截斷浸三日夜每日換水看極淨漉出搗
如泥以布絞淨汁又將藕渣搗細又絞汁盡卻輕
濾去渾腳以清水少和攪之然後澄去清水下卽
好粉曬乾收貯和糯粉白糖蒸食之或以白糖開
水沖服俱可菱粉芡粉俱用此法

味甘氣芬芳性平調中開胃補髓益血通氣分清
表熱常食安神生智慧解暑生津消食止瀉

節粉 出淮安寶應一帶多有之乃藕節搗澄取粉曬乾其價較藕粉數倍

味甘微帶苦性平開膈補腰腎和血脈散一切瘀血生一切新血產後及吐血者食之尤佳

宦遊筆記淮以南皆澤國居人蒔藕暇則瀘爲粉淘汰旣淨去其渣滓存其甘液風吹日曝漸成碎珠以湯沃而食之純任天然別有風味亦野物之可尙者矣尤著名者曰片粉擇藕之極佳者淘曬人工十倍尋常及其旣成則如白雲片片纖塵不

染味亦絕勝非大有力者不能製也

八仙藕粉 經驗廣集此粉滋胃保元治一切虛

勞雜症白花藕粉白茯苓白扁豆炒蓮肉川貝母

山藥白蜜各等分人乳另入滾水沖不拘時食

人紅丸 濟世養生集專治童子勞怯神驗之極

用人龍二十一條

卽虬蟲童便洗淨
瓦焙勿令黑研末

不破皮紅棗

三十個

飯上蒸熟
去皮核

蘿菔子一錢五分炒研大熟地

五錢煮爛杵膏真藕粉一兩五錢研真川連六分

酒拌炒研末右將紅棗肉熟地膏和諸藥末搗勻

爲丸如桐子大每早以白滾湯送下七粒逐日加
增二粒至二十一粒止以後不必再加服一料全
愈予屢試皆效切勿泛視

菱粉

蒂殼

湖州府志菱本兩角者有果菱差小有湖跌菱色
紅而大有青菱色青角曲而利四角者野菱最小
者角極銛有泰州菱實豐而美近又有無角者名
餛飩菱德清有雞腿菱文武菱

菱有多種老則皆可爲粉造粉之法與造藕粉同

食菱粉而腹脹者用薑湯或酒解之

補脾胃強腳膝健力益氣耐飢行水去暑解毒

蒂 疣子俗名飯饅用鮮水菱蒂搽一二次卽自落

殼 治頭面黃水瘡 醫宗彙編隔年老菱殼燒
存性麻油調敷卽愈

無名腫毒 販翁醫要老菱殼燒灰香油調敷卽
愈并治天泡瘡

指生天蛇 醫宗彙編以風菱角燈火上燒灰存

性研末香油調敷未潰者卽散已潰者止痛立愈
治脫肛 張氏必驗方先將麻油潤溼腸上自去
浮衣再將風菱殼水淨之卽刻縮上不脫矣

芡粉

嘉泰會稽志芡一名雞頭山陰梅市產之最盛有
數等小白皮最佳大白皮中白皮其皮甚堅難齧
黃嫩者太軟皆不逮也造粉與藕菱同法

益精氣強智力靈耳目固精添髓

養餘
月令

九龍丹 販翁醫要治腎水不足邪火淫動遺精

本草綱目拾遺 卷一 五
淋濁等症枸杞子酒蒸金櫻子焙山樵肉炒石蓮
肉炒蓮鬚焙熟地搗膏芡粉炒白茯苓當歸等分
共爲末煉蜜丸如桐子大每服三錢空心白滾湯
下

本草綱目拾遺卷七終